

ներ եւ առասպելներ: Դրանք մի ընդհանուր գիծ ունին հեղինակի՝ ժողովրդական մտախելով գրուած ոտանաւորների հետ: Մի դէպքում ներկան է պատկերացուած, միւս դէպքում՝ անցեալը, բայց երկու դէպքում էլ՝ ժողովրդականը:

Այսպէս, շատ յայտնի է Յովհաննիսեանի «Արտաւազդ» ոտանաւորը, գրուած դեռ շատ երիտասարդ հասակում: Այդտեղ նա գրական մշակման է ենթարկել հայկական հին ու ծանօթ առասպելը Արտաւազդի մասին: Ոտանաւորում արտայայտուած ենք դանում նաեւ մեր ժողովրդական մի հին սովորութիւնը, որ մինչեւ օրս էլ պահուած է շատ տեղ հայ գիւղերում, եւ որը սերտիւ կապուած է Արտաւազդի առասպելի հետ: Այդ այն է, որ աւագ ուրբաթ օրը Հայաստանի գարրիները կէս գիշերին վեր են կենում, մտնում իրենց դարբնոցը ու երեք անգամ մուրճը սայլին իջեցնում, ամբացնելու համար «չար արքայի» կապանքները:

Բնութեան մի ամբողջ պատկեր է ներկայացուած ոտանաւորի սկզբում: Ահարկու ամպերը եկել պատել են Մասիսի ճակատը: Փոթորիկը գազանի նման ոտնում է: Կատաղած քամին հառաչում, սուլում է: Չար հողմի հետ միասին՝ Մասսի վիհից հասնում են ձայներ — շղթայակապ արքայի մոնչոցը: Նրա աչքից դէպ ի վեր են ցոլանում փայլակ եւ բարկութեան կայծեր:

Կամի նա էլանել վրէժխնդիր հոգով  
Իւր անվերջ տանջանքի թոյնը մահաբեր  
Աշխարհի չորս կողմը շաղ տալու մտքով,  
Բայց՝ ամո՛ւր եմ նորա ծանր շղթաներ:

Մտերիմ գամփոնները կրծում են արքայի կապանքները, մաշում, բայց դրանք նորէն ու նորէն ամբանում են դարբինների հարուածների տակ:

Բանաստեղծը այս պատմական առասպելի մէջ դրել է ժամանակակից-հասարակական տրամադրութիւններ, որ արուեստական են դարձնում զործը: «Եթէ», ասում է նա դարբինների բերնով, «նոր կեանքի հուժկու կոչը չենք լսելու մենք», «եթէ վերածնութեան սըրբարար աւազանը մեզ չէ փրկելու», այդ պարագային աւելի լաւ է որ փշրուին արքայի շղթաները, եւ նա դուրս գայ «աշխարհին բե-

րելու կոտորած, աւեր»: Եւ սակայն, լաւատեսութիւնը յաղթում է վերջը: Բանաստեղծը դեռ հաւատում է փրկութեան: Նա յոյս ունի, որ «մի նոր երկնքից նոր լոյս կը բացուի»: Արդէն իսկ տեսնում է «ծիածանը մի ազատ, լուսաւոր, նոր վիճակի»: Դրա համար էլ վերջացրնում է իր ոտանաւորը այն տողերով, որոնցով սկսել էր. —

Ջարկեցէ՛ք, դարբիններ, կըռանը սայլիս  
Ջարկեցէ՛ք կըռանը — շղթայքն ամբանան,  
Անիծեալ արքայի կապանքն ամբանան,  
Ջարկեցէ՛ք, դարբիններ, կըռանը սայլիս:

Տեսնում ենք ուրեմն, որ Յովհաննիսեան մշակել է Արտաւազդի առասպելի այն փոփոխակը (վարիանտ), որ մեզ պահել է Սորենացին, համաձայն որի՝ Արտաւազդը չարութեան մարմնացումն է: Արտաւազդի պատկերը նոյն առասպելի մի ուրիշ փշրանքի մէջ, որ պահուած է Եղնիկի մօտ, բոլորովին տարբեր է, միանգամայն հակասակը, որ անուշադրութեան է մատնուած եղել, սկզբից ի վեր: Նոյնը պէտք է ասել նաեւ Վասակի դէմքի մասին: Սկսած Եղիշէից եւ վերջացրած Յովհաննիսեանով՝ հայ բանաստեղծութիւնը — նրա ազդեցութեան տակ նաեւ հայ պատմագրութիւնը շարունակում են մուր քսել Վասակի երեսին, որպէս մարմնացումն դաւաճանութեան եւ չարութեան, մի երկրորդ Արտաւազդ: Սորենացին եւ Եղիշէն շարունակում են իշխել ոչ միայն մեր զգացումների, այլ եւ մեր մտքի վրայ: Եղնիկին եւ Կորիւնին ուշք դարձնող չկայ: (Դժբախտաբար ձեռքի տակ չունինք Յովհաննիսեանի «Վասակը բանտում» բաւական երկար չափածոյ գրուածքը, աւելի երկար կանգ առնելու համար նրա վրայ):

Յովհաննիսեան մշակել է նաեւ Վահագնի առասպելը, իր «Վահագնի ծնունդը» ոտանաւորով: Սրա առաջին մասը գրեթէ պարզ փոխադրութիւն է Սորենացու պահած պատառիկի, իսկ երկրորդ մասի մէջ դարձեալ ժամանակակից-հասարակական մտախելներ է գրել բանաստեղծը: Նորածին Վահագնի, այդ «ահեղամոռնչ մանիկիկի» առջեւ, որ հուր-հեր ունի գլխին, որի աչքերն արեգակ են, ծովահալած մրբիկը դադար պիտի առնի, արեւը պիտի իր երեսը քօղով ծածկէ, քաջածին Մասիսն էլ